

**NATIONAL ASSEMBLY OF  
SEYCHELLES**

*Tuesday 26<sup>th</sup> October, 2021*

*The Assembly met at 5pm*

*National Anthem*

*Moment of Reflection*

*Mr Speaker in the Chair*

**MR SPEAKER**

Mersi *mesdames et messieurs*. Bonswar tou Manm Onorab. Bonswar tou nou telespektater e oditer ki pe swiv nou, isi Sesel e partou dan lemonn. Bonswar Madanm Ramkalawan, e bann Minis e nou Zofisyne Distenge.

Mersi pou zwenn nou pou sa lokazyon spesyal. Nou'n rasanble pou nou ekout en adres par Prezidan Larepublik Onorab Ekselans Wavel Ramkalawan. Nou remersye zot pou zot prezans ozordi.

E avek sa mon ava envit Prezidan delivre son adres.

**THE PRESIDENT MR WAVEL RAMKALAWAN**

*Mr Speaker,*

*Mr Deputy Speaker,*

*Mr Leader Lopozisyon,*

*Leader of Government Business,*

Vis-Prezidan,  
Sef Ziz Lakour Siprenm,  
Prezidan par enterim  
Lakour D'Apel,  
Tou bann Minis,  
Tou bann zofisyne distenge  
prezan isi. Mon rekonnnet  
*Attorney Zeneral Mr Ally*,  
rekonnnet *Brigadie Rosette*,  
*Komisyoner Lapolis e mon osi*  
rekonnnet Linda.

Mr Speaker, mersi bokou pou resevwar mon dan Lasanble Nasyonal pou mwan delivre sa *Statement* ozordi, letan nou pe selebre premye lanniverser depi ki mon ti pret serman pou vin Prezidan Larepublik.

Dan sa moman egzakt 1an pase nou ti rasanble *State House* kot mon ti pran sa serman.

E sa ti arive apre ki nou pei ti'n pas dan en prosesis elektoral ki ti lib, ki ti *fair*, ki ti kredib, dan ki mon ti'n resevwar 54.9pourisan bann vot, pou aktyelman vin premye Prezidan pou rantre *State House* apre ganny elekte direkteman par Lepep Seselwa.

Ou ava rapel Mr Speaker, zour ki rezulta ti ganny anonse le 25, apre ki mon ti'n ganny proklamen venker e letan mon ti ganny laparol, premye keksoz ki mon ti demann avek Lepep Seselwa pou fer, se pou bes zot

latet pou nou tourn fe Bondye  
Tou Pwisan e pou nou remersye  
Bondye.

Mon ti diriz nou Nasyon  
dan en lapriyer. Ozordi alor i  
toutafe normal ki mon retourn  
ankor kot sa Bondye. Sa  
Bondye ki'n protez nou pandan  
sa 1an ; sa Bondye ki'n vers son  
regar favorab lo nou pep dan sa  
bann moman difisil, pou nou  
dir avek sa menm Bondye tou  
pwisan ki nou tou nou krwar  
ladan Senyer mersi bokou pou  
ou proteksyon.

E ki ou toulstan ganny loue  
dan sa later Sesel e ki ou  
toulstan protez nou pep afen ki  
nou mars avek ou, e nou mars  
an akordans avek ou lavalonte  
dan nou lobeisans e pou nou  
byensir rod zis sa ki byen, rod  
zis sa ki bon.

Mr Speaker mon  
langazman ki mon ti donnen sa  
zour an Oktob, sete pou mon  
servi sa pep e pou mon donn  
tou sa ki mon annan. E ozordi  
mon kapab dir avek Lepep  
Seselwa ki set avek lafyerte ki  
ansanm avek Vis-Prezidan e sa  
lekip dinamik bann Minis ki  
Lasamble Nasyonal zot menm  
zot ti aprouve, nou'n kapab fer  
egzakteman sa.

Nou'n debout, nou'n pran  
desizyon e nou'n travay kot nou  
zoli pei Sesel. Ozordi Sesel i pli  
byen plase zisteman akoz nou

travay dir. E byensir akoz  
langazman Lepep Seselwa.

Mr Speaker Sesel i lo sa  
bon direksyon pou li *attend*  
bann pli gran akonplisman.  
Nou lo sa bon semen pou nou  
fer bokou plis pou nou bann  
zanfan, e pou nou kapab  
anmenn nou pep, anmenn  
bann zenerasyon ki pou vini a  
lavenir, dan semen prosperite,  
dan semen laliberte, dan semen  
la demokrasi.

Nou'n vin dan  
Gouvernman dan moman pli  
difisil. E sa i ganny rekonnexion  
non selman par Seselwa isi  
Sesel, me osi par tou kominote  
internasyonal. Lo plizyer repriz  
letan mon rankontre en  
Anbasader - e tou dernyerman  
sete Anbasader *La Belgique* ki ti  
dir avek mwan, sa lanmen ki zot  
in donn ou (parey nou dir dan  
kart) se sanmenm sa pli move  
lanmen ki ou ti ava'n kapab  
gannyen pou ou vin Prezidan  
dan en moman parey.

I dir avek mwan, mon'n  
swiv byen ou listwar e apre en  
long lalit environ 30an, mon  
krwar ou ti'n devret ganny en  
pli bon lanmen pou ou travay  
konman Prezidan.

Me selman mon ti vire  
mon ti dir avek li, "kekfwa set  
egzakteman sa ki Bondye ti  
anvi. Parske parfwa nou kapab

santi nou bokou tro confortab si lanvironnman i bon.”

E mon ti dir avek li osi “Petet dan sa moman egzakt, Parski *timing* Bondye i parfe. Bondye i met sa latas lo mwan akoz zisteman i konnen ki tanzantan mon dir ‘mon ledo i larz’, e alors in dir - be mon a met Sesel dan sa moman pli difisil lo *OU* ledo akoz ou, ou annan sa kouraz pou ou kapab diriz sa pei.”

**(APPLAUSE)**

### **THE PRESIDENT MR WAVEL RAMKALAWAN**

E Mr Speaker sete egzakteman sa ki nou’n fer. Alor nou’n vin dan Gouvernman dan moman pli difisil, kot nou sityasyon ekonomik pa ti bon me kot an menm tan ti annan bann o lekspektasyon sorti kot nou pep.

Me la mon anvi dir ki nou priyorte limero 1 konman en Gouvernman, e byensir mon salye tou bann Manm Onorab dan lekip *LDS* parke nou’n travay konman en sel lekip. Nou misyon sete premyerman pou stabiliz nou ekonomi an fas *COVID-19*.

I pa ti fasil me nou ti bezwen pran bann desizyon vit, pou nou kapab mentenir nou

pep e pou nou asire ki tou travayer i kapab soutenir zot fanmir, zot kapab anmenn en lasyet manze pou zot zisteman donn sipor zot fanmir e elve zot zanfan dan lafason ki devret.

Mr Speaker alor ozordi ou kapab konpran letan mon dir sete en moman, pou nou premyerman dir mersi avek Minister Lasante e pou nou rekonnet sa travay dir ki sa lekip medikal in donnen tou bann dimoun dan sa lekip.

E an plis ki sa pou kontribisyon sak Seselwa ki’n ede dan tou fason posib. Bann ki’n kontribye atraver bann fon spesyal ki’n ganny etabli, bann dimoun ki’n ofer zot bann fasilité pou ganny servi konman karantenn, bann dimoun ki’n fer bann donasyon medikal oubyen bann lezot donasyon. Bann ki’n pran zot letan pou konsey lezot dimoun.

E an plis ki sa, sa group travayer Lasante ki’n sorti dan zot letan retret pou zot redonn zot lenerzi, zot konesans pou angaze dan sa programm vaksinasyon.

Ser ek frer Seselwa, mon anvi dir avek zot mersi bokou sorti dan pli profon mon leker.

**(APPLAUSE)**

## **THE PRESIDENT MR WAVEL RAMKALAWAN**

Mr Speaker *COVID* in fer en kantite dezord dan nou pei. *COVID* in afekte en kantite fanmir, e i annan bokou nou bann fanmir ki'n perdi enn zot byenneme.

Ozordi ankor enn fwa mon anvi eksprim mon senser kondoleans anver tou bann fanmir ki'n perdi enn zot byenneme akoz *COVID*. Mwan osi tou Mr Speaker, mon'n perdi en kantite zanmi tre pre ki ziska aprezan mon ankor pe pler zot depar.

Alor mon dir avek tou bann fanmir kouraz, e mazinen ki Lepep Seselwa i kontinyen debout lo zot kote. Lepep Seselwa i kontinyen mazin zot dan son lapriyer.

Mr Speaker sa programm vaksinasyon ki nou'n kapab rante ladan, in arive akoz nou annan nou bann bon zanmi. Sesel ziska aprezan pa'n depans en sou pou resevwar en vaksen. Sof en pti depans ki nou'n bezwen peye pou transportasyon sa dernyen doz vaksen *Pfizer* ki nou'n gannyen.

Alor ankor ozordi mon tourn ver nou bann zanmi ki'n donn nou sa ki nou ti bezwen. Bann ki'n donn nou vaksen mon anvi remersye *Abu Dhabi*, *L'Inde*, *La Chine*, *La Russie*,

*L'Amerique* ek tou bann endividé prive, bann envestiser. Mon anvi osi remersye tou bann lab prive ki'n ede ofer bann tes neseser, pou ki nou pei ti ava kapab fer fas avek tou bann touris ki ti pe antre e sa byensir in ede pou rekonstri nou lekonomi.

Mr Speaker dan sa peryod lanfaz kot Minister Lasante, sete zisteman pou koup bann depans, bann depans tel ki bann lotel, bann latant ki ti pe lwe ek tou bann lezot depans. Nou'n reisi fer sa. Me an menm tan osi nou'n kapab sofgard nou sistenm lasante, pou ki nou pa'n vin dan en sityasyon kot a okenn moman nou pa'n kapab pran swen avek bann dimoun ki malad.

E sa ankor enn fwa se gras a sa programm vaksinasyon, san ki nou ti vreman trouv nou dan en programm, dan en sityasyon vreman difisil.

E la Mr Speaker atraver sa langazman Minister Lasante, Sesel in resevwar bokou akolad sorti kot tou bann lorganizasyon enternasyonal, bann diferan pei.

E tou dernyerman sete Linyon Eropeen dan zot dernyen konsiltasyon isi Sesel, ki ti aktyelman felisit nou pou sa programm. E ozordi letan

nou pe koze nou'n nobou redwir lakantite ka aktiv pou vin 222.

I annan 82poursan nou popilasyon ki'n pran en premye doz vaksen e 77poursan ki *fully vaccinated* e lo *average* nou pe ganny nou environ 21 ka.

Alors Mr Speaker, sa i fer ki Sesel i reste pei *L'Afrique* ki'n *entame* en programm vaksinasyon ki pli reisit. E ou ava apel ki en serten moman Sesel ti pe osi diriz lemonn dan sa programm vaksinasyon.

Alor nou'n bezwen pran desizyon. E se sa en pwen ki mon ti ava kontan ki Lepep Seselwa e zot isi bann Manm Onorab ek tou dimoun zot mazin sa ladministrasyon dan sa premye lannen. Nou'n pran desizyon.

E ozordi nou da sa prosesis pou nou amelyor nou sistem lasante. E ozordi mon kontan letan mon ganny bann komanter sorti kot bann dimoun ki'n ganny admet dan Lopital Victoria, oubyen menm bann dimoun dan lopital North East Point ki vini ki dir ki keksoz pe *improve*.

Mon osi anvi remersye Lepep Seselwa, pou sa pasyans ki zot in annan pandan sa moman kot keksoz ti vreman so, kot zot pa'n kapab petet ganny sa swen ki zot ti ava voudre. Me selman nou pe

travay e Minister Lasante pe donn son tou.

E la avek sityasyon ki pe kontinyen *improve*, nou pe kontinyen kapab anvoy nou bann pasyan ki bezwen swen medikal spesyalize aletranze. Nou pe kontinyen donn zot. Me selman an menm tan osi i enportan pou dir ki menm letan keksoz ti difisil, nou'n kapab anvoy bann pasyan aletranze e sa lo fre Gouvernman Sesel ki kontan son pep, ki pran swen avek lasante son pep e ki pou toultan debout lo zot kote.

Mr Speaker dan sa menm lespri, letan nou ti bezwen bann fasilité ekstra nou ti tap laport e Bondye ti ouver bann laport. Letan nou ti annan nou zis en *oxygen plant*, e nou ti vwar ki poudir ek sa *Delta variant* sorti *L'Inde*, kot nou pou bezwen plis loksizenn, nou ti tap laport.

E ozordi Mr Speaker, nou napa en masin loksizenn. Nou annan 3 masin loksizenn. E nou pe travay pou ki byento Praslin osi tou i ava kapab ganny en masin loksizenn, pou ki olye ki nou kontinyen anmenn bann *cylinders* sorti Mahé pou al Praslin, Praslin li osi tou i ava ganny sa fasilité e byensir sa i vedir La Digue ki pre avek Praslin, zot osi tou zot ava kapab ganny sa menm servis.

Mr Speaker ou avek mwan nou'n lite e enn bann pwen for ki'n ini nou de ansanm sete sa lalit pou drwa imen e respe pou bann drwa endividuel.

Ou ou'n pas plizyer erdtan e menm zour dan kaso. Mwan zanmen mon'n al dan kaso. Me selman tandis ki ou'n al dan kaso, me zanmen ou latet in ganny kase. Mwan mon latet in ganny kase. Minis Ferrari son latet in ganny kase. E bokou bann lezot dimoun zot latet in ganny kase.

E zisteman lo sa size drwa imen, ek respe pou drwa endividuel, se sa ki ti enn pilye nou lalit ki ti abouti dan sa viktwar 1an pase.

E donk ozordi Mr Speaker ki mon anvi reasir tou pep Seselwa, ki zot drwa endividuel pou kontinyen ganny respekte ; personn pa pou zanmen ganny bate e si i arive ki okenn sa bann keksoz i ariv e aksyon legal deswit pou ganny pran.

Mon anvi dir avek medya ki zot pou toultan ganny respekte e ki laliberte lekspresyon pou ganny proteze. Nou'n deza atraver zot isi dan Lasanble Nasyonal retir lo nou liv Lalwa lo nou Kod Penal 'difamasyon kriminel.'

E alor parey nou tou nou konnen sa ti en *major milestone*

e dan sa lespri nou pou kontinyen fer nou travay.

Mr Speaker nou lekonomi in kapab respir ankor. Nou pa pe dir ki in sorti dan lopital. Nou pa kapab ki demen i anmennen. Parey ki lannen pase, o komansman lannen nou pa ti konnen ki poudir COVID - 19 ti pou tap nou parey in tap nou. Ki poudir nou lekonomi ti pou lo sob zenou. Nou pa ti konnen.

Me selman mon anvi dir avek zot, ki sa size lekonomi in enn bann size ki'n trakas *Cabinet of Ministers*.

Konsey de Minis in pas en kantite letan pou nou kapab abord sa size. Letan bokou dimoun ti pe repoze ti pe dormi, Minis Hassan konman Minis Finans avek tou bann lezot Minis, nou ti pe rode, nou ti pe enkyet.

Pou nou rode par egzanp lafen lannen letan nou ti'n depans bokou plis. Nou ti pe depans sa ki dan rezerv ki sa fasilite ki Labank Santral i rezerve pou nou. E nou ti'n ariv nou ti'n depans plis ki R351 milyon zis pou nou fer sir ki dimoun i kapab ganny zot lapey ; ki poudir fanmir i kapab kontinyen debout ; ki poudir lasistans sosyal i kapab kontinyen ganny donne. Ki poudir biznes i kapab ganny

siporte. Me selman Mr Speaker nou ti dan en lenkyetid profon.

Me selman mon anvi dir avek ou osi tou Mr Speaker, enn bann rezon akoz mwan mon ti kapab konsol (mwan ki en pe bokou pli vye) mon ti kapab konsol Minis Finans pou mwan dir avek li, "Repoze mon frer. Rod en pe erdtan sonmey parski Bondye i pou ed nou li. Bondye pa zanmen abandonn son zanfan."

E lefe ki nou ti annan en plan, nou ti kapab travay lo en plan. Nou pa ti pe zis rode dan fernwanr konman bann dimoun ki pa vwar kler pou konnen dan ki direksyon zot pe ale.

Nou ti annan en plan. E ozordi mon anvi dir avek Lepep Seselwa, mon anvi dir avek zot bann Manm Lasanble Nasyonal e tou bann Dirizan O Profil dan nou sosyete se sa ki sa ladministrasyon in fer.

Ladministrasyon in annan en plan konkret. Nou'n pran desizyon e atraver nou programm vaksinasyon ki pa ti en keksoz ki'n ariv par azar, nou'n reisi reouver nou pei le 25 Mars.

Le 25 Mars pa ti zis en dat ki ti tonbe sorti dan lesyel. Le 25 Mars sete en dat ki nou ti planifye. E zot ava rapel ki zis apre ki nou ti reouver nou pei le 25 Mars deswit apre *Emirates* ti

repran *Aeroflot* ti rekonmans vini, *Qatar Airways* ti repran, *Turkish Airline* ti vini e souden ti annan en kantite avyon ki ti pe retourn Sesel. E viziter ti pe konmans rantre.

E atraver sa, e atraver sa bon planifikasyon dan nou lekonomi, Roupi ozordi - nou Roupi Seselwa wi, sa Roupi Seselwa ki en moman nou pa ti kapab esanz li pou okenn lezot larzan. I pa ti konvertib.

Zot ankor rapel letan mon ti dir nou pou fer Roupi vin konvertib, zot ti apel mwan 'Konvertib !' Zot ti apel mon Onorab Konvertib dan Lasanble lontan.

Me ozordi sa menm Roupi in ganny konsidere konman larzan ki'n rekiper bokou pli vit dan lemonn ! E ki ozordi i annan pli bon *rate of recovery*. E dan sa menm peryod apre louvertir pei, menm Minis Finans, menm *VP*, menm Gouverner Labank Santral ti soke pou vwar ki nou Dolar i sorti R22 pou li desann R15 e menm parfwa desann par anba R15.

E ozordi letan mon pe adres zot nou rezerv i pli o ki'n deza ete dan Sesel dan sa modern Sesel modern, apre reform ki nou ti pas ladan an 2008.

Ozordi nou *net reserves* i sorti o konmansman lannen 2020, Zanvye 2020 sorti \$430 milyon pou li ozordi an Oktob letan mon pe adres zot pou li par lao \$452 milyon!

Frer ek ser sa i en *massive achievement!*

**(APPLAUSE)**

### **THE PRESIDENT MR WAVEL RAMKALAWAN**

E letan Minis Finans i dir avek mon ki nou *gross reserves* pou lannen 2021 ki ti ki pou fini environ \$650milyon. Me an 2022 sa pou monte pou vin environ \$743milyon.

Donk frer ek ser Seselwa mon anvi dir avek zot ki tou sa bann keksoz i pa arive zis akoz mon asiz *State House*. Zis akoz nou annan en Konsey de Minis ki sorti dan en ladministrasyon *LDS*. Oubyen akoz ozordi dan Lasanble nou annan en mazorite plis ki de tyer. Non!

I arive akoz sakenn antre nou, nou trakase lo Sesel. Nou planifye pou Sesel nou leker i bat pou Sesel e nou rode ki mannyer a sak moman nou pou fer sir ki sak sou i ratre dan Kof Leta e non pa dan pos serten bann dalon.

E alor sete dan sa lespri ki nou, nou pou kontinyen travay.

E letan Minis Finans le 12 Novanm i ava prezant avek Lasanble Nasyonal ek Lepep Seselwa Bidze pou 2022, i ava osi prezant en Bidze ki pou montre ki poudir nou lo *right track*. Ki poudir defisit bidzeter pou diminyen.

E si Bondye i kontinyen beni nou, parey nou annan sa konfyans e ki napa nanryen ekstrem ki arive, nou riske pe *break event* lannen prosenn. Nou riske pe menm al dan direksyon kot nou lendistri touris i kapab retourn lo menm nivo avek 2019, ki nou servi konman sa *benchmark*.

Alor avek bann lezot lenvestisman ki pe antre dan nou pei, akoz ozordi lemonn i annan konfyans dan Sesel, nou kapab annan lasirans ki poudir Lepep Seselwa an Oktob 2020 zot ti pran sa bon desizyon! An Oktob 2020 zot in met en Gouvernman ki pou refer Sesel. Ki pou met li lo son lipye.

E apre sa ou asire ki zenerasyon apre zenerasyon pou kontinyen mars dan sa lespri prosperite.

Ozordi Mr Speaker nou'n ganny retire lo Lalis Nwanr Linyon Eropeen. Senpleman akoz nou'n montre sa langazman pou nou pas bann Lalwa apropriye. E la nou pe atann ki lannen prosenn nou

*offshore industry* ek tou bann lendistri dan lo kote finansyel, zot a kapab kontinyen fer byen. E nou pou ekspekte ki *FSA* i ava donn nou bokou plis *dividends*.

E ankor enn fwa Mr Speaker, ou konnen dan sa plan e la mon anvi eksplik zot en pe - dan sa plan ki nou annan ozordi nou annan nou en Minister Zafer Etranzer ki for.

Premyerman nou annan nou en Minis ki konnen ki i ape fer. Sa Minis in refer sa Minister. E ozordi tou bann diferan Minister e Sesel an antye i konnen ki poudir letan zot al kot Minister Zafer Etranzer, zot pou gannyen sa siper.

Bann diferan proze, ki zot pe antreprann ki pa egzanp i proze labatwar, ki nou ganny en *sponsorship* avek Linyon Eropeen. Nou konnen ki poudir nou pou gannyen sa larzan.

Nou konnen ki poudir bann *scholarship bilateral* avek bann diferan pei, ankor enn fwa letan zot dir nou zot pou donn nou, nou al rode. Nou pa espere. Nou al rode e atraver sa nou resevwar e letan nou resevwar se pou lepanouisman Lepep Seselwa.

Donk anliny avek ranforsi ou lekonomi e ranforsi tou bann diferan Minister, e pou nou rod

lanplwa pou nou pep an premye, sa i fer ki ozordi Minister Lanplwa i pe toulezour rod bann novo fason, pou nou regarde ki mannyer dan bann programm *reskilling* - bann programm *skilling*, ki mannyer nou pou adres sa bann size pou fer sir ki Seselwa i ganny lanplwa an premye.

Alor mon anvi dir avek bann biznes, nou konpran parfwa zot en pe fristre, akoz petet zot anvoy aplikasyon pou *GOP* e petet i pran en pe plis letan. Mon konpran fristrasyon ki kapab vini.

Me solman mon anvi fer zot konpran, nou pa pe fer sa akoz Minister Lanplwa i anvi fer zot malis. Nou pa pe fer sa akoz Minister Lanplwa i anvi met en bar dan zot larou. Se akoz Minister Lanplwa pe fer sir ki Seselwa i ganny sa lanplwa an premye.

Donk se pou sa rezon ki nou'n pran en latitud bokou pli serye, me an menm tan osi i annan bokou fleksibilite lo size *GOP*.

E Mr Speaker mon profite pou mon dir ozordi, le 26 Oktob, 2021 tou Seselwa ki anvi en plas travay i kapab ganny en plas travay!

**(APPLAUSE)**

## **THE PRESIDENT MR WAVEL RAMKALAWAN**

Tou Seselwa ki anvi leve kot i ete e debourye i kapab fer li. E anmenn dan lakour bokou plis ki i ti pou gannyen si i ti lo URS oubyen si i ti ankor pe resevwar *welfare*.

E la mon anvi dir Mr Speaker, ki poudir bann *redundancies* in desann. In annan plis ki 4,500 *vacancies* pou travay ki'n ganny poste. E ant Zanvye avek Septanm 2021 Departman Lanplwa in kapab plas plis dimoun dan lanplwa par 91poursan konpare avek menm peryod an 2020, ant Zanvye avek Septanm.

Lannen pase dan sa peryod ti annan zis 668 dimoun ki ti ganny plase dan lanplwa. Sa lannen anba en ladministrasyon LDS in annan 1282 dimoun e alor dimoun i kapab ganny en plas travay.

**(APPLAUSE)**

## **THE PRESIDENT MR WAVEL RAMKALAWAN**

Mr Speaker dan sa menm lespri i vedir ki atraver sistem *welfare* nou'n kapab koup labi. Me nou'n fer sir ki tou dimoun kid an bezwen, tou dimoun ki parey nou konsider zot vilnerab

ki'n bezwen en lasistans zot in kapab ganny sa lasistans.

Me an menm tan mon bezwen dir, in annan en kantite labi. E la zis pou pep Seselwa konnen ki poudir dan sa menm peryod ASP in rann Gouvernman atraver STC en sonm R1.7milyon.

E sa sete bann larzan ki ti lo bann kart pou bann dimoun swadizan vilnerab, larzan ki pa'n ganny depanse e alor in bezwen retourn dan Fon Gouvernman. Zot konpran mwan letan mon dir labi nou'n bezwen koupe ?

E sa labi ki nou pe koupe, se pou nou kapab vin pli for demen. Nou, nou anvi konstri en Sesel ki bokou pli for, en Sesel ki bokou pli meyer, en Sesel kot sak son zanfan letan i leve dan bomaten i dir mon pe al travay.

E sa travayer i ava osi kontribye dan son Fon Pansyon, pou li asire ki letan in ariv son laz retret, non selman ki i ava ganny Sekirite Sosyal me i ava osi ganny en pansyon pou li soutenir son fanmir.

*Red Cross* osi konman en partner in asiste. E an prensip zot in ed lo *on average* ant 5 a 6 fanmir tou le semenn. E Lepep Seselwa letan zot tande ki poudir i annan laliny kot *Red Cross*, pa tonm dan sa pyez e

nou'n tann *Red Cross* menm dir napa okenn laliny kot *Red Cross*.

Donk Mr Speaker nou'n fer en lapros, kot nou'n dir avek dimoun fodre ki zot sorti lo *welfare* pou zot al dan lanplwa. E sa program in en sikse. Zot in tann mon yer swar letan mon'n fer referans avek sa zenn fiy dan program Tremolo, kot ozordi i annan son prop pti biznes e demann pou son biznes i tro bokou, byento i pou bezwen li anploy dimoun. Kot i ti ete avan? I ti lo *URS*.

E letan I demann li be ki mannyer ou'n konmanse i dir letan *URS* ti'n fermen mon'n al dan sa biznes.

Alor in marse. E mwan dan mon kapasite konman Dirizan nou pei Sesel, mon anvi ankouraz tou Seselwa pou zot pa kale, me pou zot al delavan rod en plas travay donn nou tou sa ki zot anvi, tou sa ki zot kapab pou zot kapab debourye, soutenir zot fanmir. E an menm tan osi fer lasosyete grandi.

E ozordi Mr Speaker letan i annan serten dimoun ki'n ganny plas travay kot bann lotel e avek nou lendistri tourizm, ki'n repran, i annan serten travayer ki lafen dimwan zot pe ganny par lao zot lapey en *service charge* R10,000.

Ki vedir si zot lapey i R10,000 zot pe anmenn dan lakour R20,000. Se sa lespri ki mwan mon anvi met dan nou pep, met da nou lazenes. Parske se sa fason ki pou fer nou vreman avanse.

E ankor enn fwa nou pe debourye nou. an 2020 nou'n fini sa rikord ki ti annan an 2020 pou touris, apre bann fraka ki *COVID* in fer. Ozordi sak novo viziter ki apoz Sesel i en novo rikord. E nou espere ki nou ava fini lannen avek en pe plis ki 175,000 touris.

E la parey nou'n vwar *Air France* in rekonmans pran son vol Dimans. E sa dan li menm ankor enn fwa i pou donn nou bokou plis lankourazman. E nou espere ki i ava annan bann lezot laliny aeryen ki ava konmanse.

E zisteman dan lendistri touris sa plan ki nou ti pran pou nou ferm STB e pou entegre li dan Departman Tourizm, sa in fer ki non selman ki nou'n nobou koup en pe bann kou. Me nou'n osi vin bokou pli efektiv.

E atraver sa nou'n nobou eksplor bann novo marse. E se pou sa rezon ki letan mon'n dir ki nou riske lannen prosenn etablir novo rikord, e nou ava kapab bouze, se parski letan ozordi *L'Europe* pe ouver e *Air*

*France la pe anmenn sa weekend in anmenn prensipalman touris Français.*

Letan *L'Allemagne* i ouver, ki si nou pe ganny tou bann viziter sorti dan nou marse tradisyonnal, e lo lot kote bann nouvo marse ki nouvo Departman Tourizm pe lanse e pe ankouraze pou vini, se sa ki ava kapab fer nou bouze.

Me selman mon dir atansyon, atansyon, atansyon Lepep Seselwa! Annou fer sir ki nou pa detri sa lendistri touris! Se sa i mesaz ki tanzantan Minis i dir.

Letan en touris i ganny vole lo lans. Letan en touris i ganny vole dan son lasanm, letan en touris i ganny sarze R200 pou en koko rouz. *Come on!* Annou arete avek sa kalite latitud.

Konmsi mwan pou mon i vreman kas mon leker. Letan mon mazinen ki lontan i ti pou en plezir ki en Seselwa donn en touris. Koup en koko donn en touris kado. E ozordi nou sarz en touris R200 pou en koko, ki probableman in ganny vole lo propriyete en lot dimoun. Sa i pa byen!

E alor mon osi fer en lapel avek Lepep Seselwa. Parski ki sa bann dimoun i fer ki pou ede detri nou lendistri touris, i pou osi annan en lenpak direk lo

nou lekonomi. Nou menm nou ki pou soufer letan touris i aret vini.

Alor mon demande ki dan tou ban kominate e zot konman bann *MNA* dan zot kominate, annou fer sir ki nou annan bann dimoun, nou annan nou bann sitwayen ki ava konsey bann touris.

Oubyen ki ava koz avek sa bann dimoun ki pe fer sa bann tel aksyon, pou dir avek zot "mon frer si ou kontiny dan sa direksyon nou pou retour ankor parey letan *COVID* ti ape tap nou a plen e ni touris nou pa pou gannyen."

Alor annou fer sa pou nou aret sa kalite latitud. Me la ankor enn fwa dan sa devlopman nou lekonomi, nou vwar ki lendistri touris i en lendistri kot nou pe vreman fer bokou travay, pou ou premyerman ;- konstri bann lenfrastruktir dan bann distrik. I annan bokou bann *MNA* kot i annan bann lenfrastruktir ki'n fini konmans ganny konstri.

Mon konnen par egzanp lo Praslin, i annan *ice plant* Grand Anse ki'n fini konmanse, nou pe espere ki poudir Baie Sainte Anne osi tou nou ava kapab byento konmanse, Cascade keksoz pe bouze, Anse Aux Pins osi tou i lo lamars, North East Point, La Retraite i en fasilite

ki'n fini konstri. Glacis osi tou i annan bann plan, Baie Lazare osi tou i annan keksoz lo latab.

Alor tousala se pou nou ed nou bann dimoun pou zot kapab avanse. E si tou keksoz i mars byen, mon anvi dir ki *both* dan lendistri lapes, e osi dan lendistri lagrikiltir nou pou byento kapab vin avek en plan pou nou regarde lo sa nivo *GOP*, ki mannye nou kapab redwir li pou nou kapab donn plis lankourazman. Akoz sekirite alimanter i vreman enn ki tre enportan.

E la byensir osi tou avek bann proze pou nou al ver en lapes soutenab e responsab, sa osi tou pou ed nou pou nou gard nou bann stok.

E lo lot kote sa lansman *aquaculture* komersyal sa proze i enn kot nou'n deza pe konmans ganny lentere sorti kot bann envestiser etranze, e osi bann envestiser lokal.

E letan nou pe mazin osi lans nou lendistri ton, i annan de keksoz enportan la, se nou'n fini idantifye bann later kot nou pou al dan plis lendistri. E apre osi tou dernyerman letan Linyon Eropeen in vini nou'n kapab negosye avek zot pou zot pey nou bann maren Seselwa e sa ankor enn fwa i en gran reisit.

Mr Speaker ou vwar, tou sa bann keksoz ki mon pe dir, i pou anmenn benefis pou Sesel. E se sa ki pou kapab permet nou annan en sistem lasante ki pli *top*, en sistem ledikasyon ki pli *top*, ki pou kapab permet nou donn tou nou bann zenn sa possibilite pou zot kapab al pli lwen posib.

E anmezir ki nou regard lagrikiltir - e la Mr Speaker mon anvi dir avek Lepep Seselwa ki lagrikiltir in enn bann sekter ki'n ganny li en nouvo lelan. E sa nouvo lenerzi in konmans letan anba *ADF* in annan plis larzan, sorti 12 milyon ozordi bann fermye i annan zot a zot dispozisyon 24 milyon.

E sa i fer ki, ki fermye i kapab ozordi annan akse avek bann *loan* ki lentere i ba, pou ziska e sonm R5 milyon.

Mr Speaker mon kapab dir avek ou ki dan sa lendistri, dan sa sekter ozordi i annan en mouvman ekstraordiner. E Minis li menm li i pe travay for avek bann lezot Minister pou fer sir ki alokasyon later i ganny adrese lo tou le 3 zil pou bann fermye.

Lo Praslin in deza *entame* sa, lo La Digue osi tou in deza *entame* sa, e lo Mahé nou pe fer sir ki i annan plis fermye ki pe rantre dan prodiksyon.

E la Mr Speaker apre ki nou'n retir tou bann *quota* lo prodiksyon, i annan 17 laferm *livestock* dan Val Den D'Or ki pe dir zot pe al ogmant zot prodiksyon.

E ankor enn fwa nou pa'n asize. Zis ant 2020 avek 2021 nou'n trouv en logmantasyon 23poursan lo prodiksyon pork e 20poursan lo prodiksyon poul.

E la nou plan se pou nou regarde ki mannyer, nou pou kapab ogmant prodiksyon Nasyonal. E lo proze ki nou pou *entamer* byento lo Coetivy atraver *IDC*, lide se pou ogmant prodiksyon nasyonal. Pa zis pou konpar en lannen avek en lot lannen, prodiksyon nasyonal lo poul e pork par omwen 20poursan.

Si Coetivy i kapab fer sa avek sa ki nou pou kapab fer isi lo Mahé, lo Praslin e la nou pe espekte ki poudir lo La Digue laferm *L'Union* i pou kapab li osi tou ganny en novo lelan.

Mr Speaker mon krwar ki nou sekirite alimanter i dan bon direksyon. E nou pe menm koz ozordi an term pou nou kapab prodwir nou bann prop 'pti poul en zour', ki nou ava fer *available* pou bann fermye oye depans zis lo lenportasyon.

E dan sa menm lespri, parey nou'n dir labatwar lo Praslin i pe byento la i pou fini,

bann lenfrastriktir in fini monte, lekipman nou ape travay lo la e byento nou pou ganny bann lekipman.

E lo Mahé nou'n fini idantifye en novo kare later lo later konblaz Providence, kot nou pe al fer en novo labatwar. E sa labatwar i ava lo en standar pli o nivo posib.

E la Mr Speaker anmezir ki nou lans nou dan sa direksyon, nou pou osi ankouraz bann lezot fermye ki anvi fer zot prop labatwar, e pou zot debourye pou zot fer bann *parts* nou pou osi donn zot sa lankourazman.

E la mon anvi kantmenm dir avek bann fermye lo Praslin, zot pre avek mon leker parey zot tou zot konnen konman en Pralinwa mon'n ekoute letan zot in apre *tutta absoluta* in tap zot Praslin, e zot pa'n kapab vreman fer sa larzan ki zot ti pe atann atraver zot prodwir tomat.

Mon anvi dir avek zot ki mon senpatiz avek zot, me selman nou priye pou ki bann mezir ki nou ava pran nou ava kapab a tou moman, gard sa pes anba kontrol e mon priye ki lannen prosenn nou ava ganny nou en tre bon rekolt.

Mr Speaker mon pe rakont zot ozordi sa ki nou'n fer pou sa pei, e sa ki nou anvi fer osi tou.

E la mon anvi dir ki lendistri lokal pe resevwar tou sa latansyon ki i merite.

Nou pe sey donn tou lankourazman pou nou al re eksplwat ankor nou bann plant tradisyonnal, ki enn fwa ti anmenn bokou larzan. Nou'n deza lans proze kannel, la ankor enn fwa nou bezwen dir i annan en gran devlopman dan sa domenn.

Annou pa zis mazin pe anvoy dimoun bat kannel. Non. Ozordi nou pe viv dan en *monde* modern. Sa ki nou ti fer 50an pase, 75an pase ozordi nou fer li dan en fason diferan an servan teknolozi modern e larzan ki nou'n resevwar i bokou plis.

Donk sa lendistri i annan bokou lentere ki pe gannyen. Nou anvi relans lendistri lavanniy e lo Praslin lo La Digue *sorry* lo La Digue *L'Union* sa plantasyon lavanniy pe ganny latansyon ki i merite. Lo Coetivy osi tou ki enn fwa ti prodwir en kantite lavanniy sa osi tou pe arive.

Nou pe al osi regarde ki mannyer nou kapab devlop plis bann prodwir koko e delwil *virgin oil*, ek tou bann lezot prodwir ki ganny servi par bann gran lakonpannyen kosmetik sa osi tou nou pe al ladan. San bliy patsouli e safran. Safran

ozordi i en zepis ki lemonn antye pe rode, akoz son bann valer medisinal e tou.

Donk letan nou pe dir ki lendistri pe met lanfaz lo ki mannyer pou fer tou sa bann keksoz devlope, an menm tan osi nou realize ki pou dir i annan serten keksoz ki kapab pran plis letan. Me nou, nou bezwen etablir sa fondasyon. Menm si i pou pran ou en pti git letan me si ou pa fer sa fondasyon zanmen ou pou arive.

Donk nou osi met lanfaz lo redistribisyon later endistriyel ki en gran priorite. E la ozordi Mr Speaker mon kapab dir avek ou ki avek lanfaz ki nou'n mete, zis pou sa lannen ziska aprezan, nou'n nobou kolekte R16.1 milyon avek bann dimoun ki lwe bann later endistriyel, konpare avek 12 milyon an 2019.

E i annan 16 sa bann dimoun ki ti annan bann *lease* ki pa'n devlope, i annan 16 ki kot Biro *Attorney Zeneral*, pou nou repran sa bann later pou nou kapab donn bann dimoun ki vreman enterese.

Proze Eve Island malerezman pandan tro bokou letan zot in ganny anbete - bann dimoun ki'n fer laplikasyon zot in ganny anbete. E nou'n dekouver ki poudir ti napa ni

menm en plan pou lenfrastriktir.

Me selman dimoun ti pe ganny dir byento pou ganny en kare later. Se la aprezan ki nou pe travay lo son plan lenfrastriktir, e nou pe met lanfaz pou ki bann dimoun lo Praslin zot ava kapab debourye e pou zot kapab konmans zot bann biznes e pou zot ale.

So tousala Mr Speaker nou pe sey fer pou nou koup tou sa bann sa ki nou apel *red tape*, pou nou kapab fer biznes vin pli fasil. E sa ladministrasyon i focus lo fer keksoz mars bokou pli vit. Letan en dimoun i anvi fer son biznes i konnen ki pou dir keksoz pe debourye.

E mon'n vreman ankouraze. Par egzant sa semenn letan mon'n zwenn en lenvestiser ki'n dir avek mwan i vreman kontan pou sa lakey ki in gannyen avek Minis e avek son lekip. E tou bann larepons bann kestyon ki i ti pe rode in gannyen.

E alors la i konnen egzakteman ki mannyer i pou bouze. E se pou sa rezon Mr Speaker ki ozordi nou pe koz lo *Foreign Direct Investment (FDI)*, ki pandan en kantite lannen nou pa'n tro tande Sesel.

Nou'n koz lo proze lotel Anse La Mouche, ki pe deza pe in deza demare. Nou pe koz lo

*Cheval Blanc L'Intendance* ki ankor enn fwa byento pou demare. Nou pe koz lo *Long Island*, en proze ki annan plis mon krwar ki 15an depi in demare. La mon kapab dir avek zot ki byento nou espere ki i ava reganny son lelan i ava demare.

Avani bann nouveau devlopman ki pou arive lev son nivo. Maia ankor enn fwa ki pou bouze. Lotel lo Platte ki mon'n ganny sans pou mwan vizite, pou vwar ki poudir tousala se bann keksoz ki pe bouze.

Lotel lo Fregat ki pe al refer, kot ankor enn fwa nou pe espekte ganny en lenvestisman plis ki \$100milyon. E lo D'Arros osi en lenvestisman parey mon'n dir yer swar plis ki 64 milyon.

Donk tousala se bann keksoz ki nou pe travay lo la. E an menm tan osi dan plan nou pe travay pou ki parske nou pe osi ganny bann don kot lopital La Digue byento i ava pe konmanse, bann dernyen bout papye pe ganny finalize.

Me osi Anse Royale kot lopital i ete kot nou pou annan nou en sant *emergency modern*, kot pou annan *link direk* avek *L'Amerique* e tousala se bann keksoz ki nou pe travay lo la pou ki nou kapab bouze.

Me pou nou kapab fer sa tou sa bann keksoz arive, fodre ki tou bann dimoun i alert, tou bann dimoun i pran zot responsabilite e bann keksoz i bouze.

Mr Speaker enn bann konsern - e se la ankor enn fwa kot nou'n sey regarde enn nou bann konsern se fer sir ki dimoun i kapab ganny en lakaz oubyen en morso later. Mon'n dekouver ki nou pou bezwen sanz plizyer Polisi, parske i annan plizyer Polisi ki pe met Seselwa retar. Spesyalman pou Seselwa ganny en bout later letan son larzan i la pou li kapab konmanse.

E sa i pou en priyrite la dan sa dezyenm lannen ki konmanse, pou ki kot nou kapab, kot bann dimoun in kalifye pou li ganny en bout later e si in nobou idantifye en bout later nou pou met divan anba son lezel.

Ou annan ou larzan akoz ou'n kalifye ensidswit, ale rantre lo later, ganny ou later fer ou travay e sa i ava diminyen.

**(APPLAUSE)**

### **THE PRESIDENT MR WAVEL RAMKALAWAN**

E sa e sa dan li menm i ava diminyen lakantite dimoun ki

pe fer sa demars e zot ava kapab ranforsi zot bann fanmir.

E dan sa menm konteks osi tou, nou'n deside pou nou e byento *Bill* pou vin devan zot, *The Infrastructure Agency Bill*, kot nou pe form en Lazans Lenfrastriktir. E li sa Lazans se li ki pou *oversee* tou bann konstriksyon - konstriksyon Gouvernman dan nou pei, e kot zot ava nobou donn zot konsey e swiv bann proze pou fer sir ki napa sa bann gaspiyaz. Napa tou sa bann kalite retar dan sa bann proze. Parski nou anvi keksoz i bouze.

E par egzanp mon'n riye yer letan mon'n aprann apre tou sa bann kestyon ki zot in demande lo lekol La Rosiere, kestyon parti kestyon, kan proze pou konmanse ? Konnen ki mon'n dekouver yer? Sa plan lekol pa pou zanmen antre lo sa bout later, akoz i bokou pli gran ki sa bout later !

So avek sa Lazans Lenfrastriktir, nou pa ava ganny nou sa bann sityasyon parey, kot zanfan i kontinyen demann kestyon, paran i kontinyen demann kestyon, MNA i kontinyen i anmenn kestyon dan Lasanble e nou ava kapab *once and for all* fini avek sa.

E byento *well Physical Planning Bill* i deza devan zot

konman Lasanble e sa i ava fer ki nou ava ganny nou en Lalwa modern, ki i ava diriz tou bann keksoz ki i annan pou fer avek *Planning* ;- i ava osi donn bann akse, parey toultan nou'n koze lo bann la *plage* ensidswit.

So mon met sa devan zot e apre zot deba, mwan mon pou pran li konman en vre plezir pou mon *assent to* sa *Bill* ki letan zot ava'n donn zot la probasyon.

E ankor enn fwa dan sa menm lespri rekonsilyasyon parey zot in okouran e VP ti vin devan Lasanble pou donn bann lesplikasyon, nou pe pran sa desizyon pou nou rann serten bann later ki'n ganny pran, ki ti ganny *acquired* avek bann dimoun ki pa'n zanmen ganny servi.

E nou'n fini etabli bann mekanizm. *Attorney Zeneral* in donn nou direksyon legal lo ki mannyer pou fer li. E tou bann dimoun I annan ziska le 31 Desanm zot ranpli en form, anvoy zot laplikasyon. E o firanmezir parske la nou pou bezwen osi fer en lamannman dan *State Land and River Reserves Act* pou nou kapab zisteman rann sa bann later.

E nou ava espere poudir sa osi tou I ava kontribye dan sa travay rekonsilyasyon ki nou pe fer.

Mr Speaker dan nou bann kominote nou'n rod nouvo fason pou nou fer travay. *Local Government* in sanze konpletman. E ozordi se lanfaz se lo ki mannyer nou fer en kominote marse. Ki mannyer nou fer bann distrik marse.

E sa kolaborasyon ant Gouvernman Lokal avek bann Dirizan dan bann dirizan distrik, i enn bann keksoz ki pe ganny pran o serye.

E parey nou konnen sa ladministrasyon *LDS*, li i pa'n enterese konnen ki parti politik ou reprezante.

Me letan ou'n ganny elekte dan en distrik, oubyen ou montre serten lentere dan en distrik kot ou reste, letan i annan konsiltasyon pou fer ou osi ganny konsilte.

E nou'n osi a lafen sa premye lannen, plizoumwen donn tou bann *MNA* parey nou ti promet, tou bann *MNA* en fasilité biro. I annan serten landrwa kot sa pe ganny konstri parske napa sa lespas, me selman nou'n tonm dakor ki poudir nou pou ed zot e an menm tan osi degaz lasasen.

Ti annan 4 *daycare centres* ki ti'n fini fer. Me ki pa ti ankor donnen. Minis in bezwen pouse e la nou kontan ki poudir sa 4 *daycare centres* in fini ganny *allocated* e sa i ava

fer ki bann paran Takamaka, Glacis, Anse Aux Pins ek Grand Anse Mahe, byento zot ava kapab ganny sa fasilité pou zot anmenn zot bann zanfan. E sa dan li menm li i kava en gran soulazman.

E ozordi napa *DA* ki ganny nonmen par Prezidan oubyen par Minis. Sa ankor enn fwa i nou lot lespri pou donn tou Seselwa. Letan nou dir Sesel i pou tou son zanfan, savedir tou zanfan Seselwa i devret kapab ganny posibilité pou li travay dan Gouvernman.

Alors ozordi letan i annan en laplikasyon, ou kapab fer ou laplikasyon, ou ganny *interview* par en *panel* kot Gouvernman Lokal e si ou annan sa kalifikasyon *and the right attitude* ou pou ganny sa plas travay.

Tousala alors Mr Speaker, se lafason ki nou'n transform sa pei. Nou pa'n asize pandan sa lannen, nou'n travay. I annan ki'n mank sonmey. I annan ki pa'n ganny okenn sonmey.

E letan nou pe kalkil Lédikasyon, byensir nou tou nou'n soke letan Minis Valentin in vin devan Lasanble, pou li donn bann *average* pou bann *marks* lo *Anglais, Français* avek Matematik. Nou'n soke.

E la mon anvi dir ki dan Lédikasyon sa programm

restriktirasyon in fini konmanse. E nou pou met lanfaz pou nou lev bann standar. E anmezir ki nou ankouraz laprantisaz, nou pou osi donn lankourazman bann *teachers*.

Tro souvan nou bliy bann *teachers*. Bann *teachers* in ganny oubliye. Zot in anmas zot kou pandan lazournen. Zot in retourn dan lakour dan en leta depresyon. E se pou sa rezon k ii annan bokou zot ki'n kite.

E la ozordi sa mon konnen i tre pre avek leker Minis Valentin, se pou regarde ki mannyer nou kapab akonpanny sa *teacher*. Donn li sa lankourazman. E an menm tan osi ankouraz sa paran pou li montre en pli gran lentere dan ledikasyon son zanfan, tout an konesans ki poudir si i donn son zanfan sa sipor, napa nanryen ki pou bar son zanfan. Lesyel ki pou limit. Lorizon - i pou al pli lwen ki lorizon.

Alors ankor enn fwa, *we are on the right track*. I annan bokou *challenges*. Me sa ladministrasyon pe fer tou sa ki I kapab. E tousala dan lespri kot nou pou donn nou bann Seselwa en ledikasyon pli o nivo, pou ki dan bann landrwa travay kot ozordi petet nou napa Seselwa avek sa

kalifikasyon nou av kapab byento ranplase.

E la zisteman, dan sa lespri anmenn Seselwa, nou pe osi regarde ki mannyer nou kapab atraver sa Departman dan Zafer Etranzer kot bann Seselwa dan *diaspora*, pou nou regarde ki mannyer nou pou kapab, si i annan bann Seselwa kalifye en pe atraver lemonn, pou nou regarde ki mannyer nou kapab fer zot retourn Sesel, pou zot kapab fer kontribisyon pou zot kapab ganny sa bann pozisyon.

Parske pou nou dan sa ladministrasyon e dan *LDS* i annan zis en Sesel! E ou Nasyonalite baze kot ou lonbri in antere i fer ou vin en Seselwa. Ki ou en Seselwa *L'Angleterre*, ki ou en Seselwa *L'Amérique*, ki ou en Seselwa *Canada* oubyen *Australie* oubyen nenport ki pei pou nou ou en Seselwa e alors ou kapab fer ou kontribisyon an ver ou pei Sesel.

E alor la Mr Speaker, dan sa menm lespri nou anvi kontinyen ankouraz nou bann zenn, pou zot angaz zot dan spor. Nou'n vreman kontan letan O Komiser *Anglais* in lans *the Premiere League* isi Sesel, kot bann - i nice letan ou pase ou vwar bann nou bann zenn dan zot triko *Arsenal* - mon pa tro sir, me selman mon pou

nom *Manchester United* apre Sanmdi.

*(laughter)*

## **THE PRESIDENT MR WAVEL RAMKALAWAN**

Me selman, letan ou vwar zot dan tou zot bann *t-shirts* pe *compete*, i donn en nouvo lelan.

E nou osi remarke ki poudir bann paran osi tou zot pe montre plis lentere. Me se sa ki nou anvi. E se sa ki pou permet bann zenn pou zot sorti dan bor semen, ki pou permet nou bann zenn pou zot annan en laspirasyon.

E ozordi letan zot regard Kevin Betsy ki pe *coach* tim *Arsenal under 21*. Konmsi pou nou montre ki poudir be Seselwa i annan sa talan. E alors nou kapab devlope.

E la mon kontan ki poudir ki nou bann zenn sa lapel k i mon'n lanse pou ki Sesel i met en target, pou nou kapab ganny nou premye meday Olenpik, nou bann zenn dan sport pe pran sa o serye.

E mwan mon vreman ankouraze letan mon regard *the spirit of Felicity Passon* ki ti naze sorti La Digue al Praslin apre retournen. Oubyen *the spirit* en dimoun ki pli vye Joel

Melanie ki'n montre nou bann zenn ki poudir ou kapab fer li.

Alors mon pe dir se sa *this is the Seychellois spirit!* En *spirit* ki pa zanmen *les tonbe!* Se sa ki nou bezwen devlope.

**(APPLAUSE)**

### **THE PRESIDENT MR WAVEL RAMKALAWAN**

Mr Speaker mon bezwen osi dir ki in annan bokou zefor ki'n ganny fer an sa ki konsern transpor dan nou pei. E la ozordi nou pe finalman met bann dernyen latous, pou nou kapab byento konmans sa proze Por Victoria.

Nou'n bezwen regard sa plan de novo, regarde ki mannyer nou pou kapab fer keksoz diferaman. E mon vreman kontan ki poudir nou annan en lekip vreman dedye e sa novo *Board* kot Por i vreman annan e lelan ekstraordiner. Donk sa i pou enn.

*Airport* tou nou bann lenfraftiktir pou nou regarde ki mannyer nou kapab annan en sistem transpor ki i lo later, ki i lo lanmer ki dan ler kot nou konnen dan ki direksyon nou pe ale.

E donk kot fodre pran desizyon, nou pou pran

desizyon pou nou kapab avans devan. E dan menm ankor enn fwa dan sa menm lespri, mon vreman kontan poudir ki i annan en transformasyon ki pe arive dan nou Lafors Lapolis.

Mon santi mwan bokou ankouraze avek bann rapor ki mon gannyen e *ComPol* Ted Barbe mon anvi dir avek ou ki ansanm avek ou de Depite Komisyoner, bann komanter ki nou pe konmans gannyen avek Lepep Seselwa, se ki finalman krim pe konmans ganny detekte dan nou pei.

Letan ou fer en rapor Lapolis Kordgard i annan aksyon i ganny pran. E mon dir avek ou kontinyen dan sa lespri, Lasamble Nasional pou donn ou sa sipor letan ou prezant ou Bidze. E mon espere ki poudir atraver sa, nou popilasyon bann viziter ki antre dan nou pei, i ava kapab konn lape ek sekirite.

E dan menm fason osi i annan bokou bann lezot demars ki deza pe konmans ganny fer. E byensir parey zot tou zot konnen yer nou ti konman Komandan Sef Lafors Defans Sesel, mon ti promot Mr Rosette pou li vin Brigadye dan nou Lafors.

Sa dan li menm i montre ankor enn fwa, en novo letap dan nou Lafors Defans. E

byento mon krwar sa semenn menm, zot pou pas bann diferan Lalwa ki pou sanz non nou Lafors Defans.

Nou pou donn li son non Konstitisyon li menm li in prevwar. I pou nepli apel *Seychelles People's Defence Forces*. Me i pou apel *The Defence Forces of Seychelles*, (*Seychelles Defence Forces*).

**(APPLAUSE)**

### **THE PRESIDENT MR WAVEL RAMKALAWAN**

E dan sa menm lespri nou'n osi tonm dakor avek *Defence Council* ki poudir i annan serten bann senbol dan Lafors Defans ki pou sanze. E tousala dan sa lespri pou nou transform sa lafors.

E la Brigadye parey mon'n fer yer mon anvi felisit Lafors Defans Sesel, pou lafason zot in konport zot pandan sa premye lannen dan sa tranzisyon, dan kreasyon sa novo Sesel. I en lafors ki definitivman in pran li en lelan profesyonnel, in pran li en lelan ki pou donn lankourazman bokou nou bann zenn.

E sete dan sa lespri ki nou bezwen lwayote anver nou paviyon, lwayote anver nou pei Sesel. Alor kontiny sa bon

travay e ansanm avek Lapolis kontinyen fer sir ki lord ek lape i renye dan nou pei.

**(APPLAUSE)**

### **THE PRESIDENT MR WAVEL RAMKALAWAN**

E zisteman Mr Speaker, sa lalit kont drog, mon annan gran loner poudir i pe konmans aport bokou fri. Si ozordi drog dan nou bann kominote in diminyen si ozordi en *line* in sorti R25 in ariv 350 oubyen pres R500, se parski Lafors Sekirite pe fer zot travay e drog pe ganny met anba kontrol !

**(APPLAUSE)**

### **THE PRESIDENT MR WAVEL RAMKALAWAN**

Alor ozordi mon anvi senpleman dir ankor enn fwa, avek bann trafiker parey mon'n dir mon'n donn zot dernyen *warning*. Depi lotrozour mon'n donn zot dernyen *warning*.

E ozordi sirman zot konnen ki poudir sa bann ki pa'n ekout sa dernyen *warning*, i annan bokou zot ki an detansyon, parski i bann sarz in fini ganny mete kont zot.

E alor ozordi mon pou senpleman dir sa pou bann

dimoun ki ankor antete. Mon anvi dir avek zot, arete dan sa drog. Akoz zot pe anmenn en konba ki zot pou perdi.

**(APPLAUSE)**

### **THE PRESIDENT MR WAVEL RAMKALAWAN**

Mon anvi dir avek bann trafiker drog, *you are fighting a losing battle !*

**(APPLAUSE)**

### **THE PRESIDENT MR WAVEL RAMKALAWAN**

Nou konn zot. Nou pe get zot. Nou pou anmas zot *enn par enn* ziska ki drog i fini dan nou pei Sesel!

**(APPLAUSE)**

### **THE PRESIDENT MR WAVEL RAMKALAWAN**

Mon dir zot sa. E mon dir avek zot *arete !* Donn nou lazenes en sans pou li epanouir, en sans li pou li grandi, en sans pou li grandi an bonn sante dan sa pei Sesel.

La mon fer en lapel avek bann Manm isi dan sa Lasanble ki annan koneksyon drog. Mon anvi dir avek zot, *arete !* Zot bann Manm Onorab zot, tas fer en fason *arete !*

**(APPLAUSE)**

### **THE PRESIDENT MR WAVEL RAMKALAWAN**

Mr Speaker, mon pe fer en lapel ozordi avek tou bann *civil servant*, silvouple annou aret fristrasyon Lepep Seselwa. Annou nou tou dakor pou nou vin bann vre serviter. Sa ki pe trenn son lipye silvouple aret trenn ou lipye ! Sa ki trenn lipye i pa pe azir konman en vre zanfan Sesel.

E alor si ou ganny bouze, pa bezwen kriy lasasen, pa bezwen vin obor Lorloz. Travay avek serye, delivre, pa fer sa pep atann. In annan bokou transformasyon ki'n arive. In annan bokou dimoun pandan sa lannen ki'n montre ki poudir zot in enterese pou vwar keksoz bouze, e alor ozordi mon pou fer kler, sa ladministrasyon i anvi rezilta !

Sa ladministrasyon i pa anvi en pep fristre. Akoz i pe atann en larepons sorti dan en biro. Donk annou fer li byen.

Lasanble Nasyonal mon anvi remersye zot, pou lafason ki zot in asiste Gouvernman pandan sa premye lannen.

Mr Speaker premyerman pou ou gidans. Deputy Speaker osi tou pou ou gidans. Onorab Georges pou ou rol konman *Leader of Government Business*.

Mersi bokou pou lafason ou'n ekliersi en kantite dout.

Mon ti ava kontan osi remersye Onorab Sebastien Pillay pou lafason ki ou'n ensiste, pou lafason ki ou'n fer ou lavwa tandé. E byensir sa sez kot ou asize, sa i en sez ki fer lavwa tandé! Alors mersi bokou pou spesyalman pou moman kot zot in kapab tonm dakor e fer keksoz bouz pli devan.

Sa lannen zot in pas 52 Bills. Mon mazinen i en rikord sa. Konmsi zot in pas enn pou sak semenn dan en lannen. Mersi bokou nou presye zot zefor e parfwa letan mon arriv dan lakour mon trouv zot pe kontinyen pe debat lo en pwen. Mon ti a voudre mon ti ava kapab pou parfwa pou donn en solisyon, me malerezman mon pa kapab.

So mersi bokou pou zot travay ki zot fer.

**(APPLAUSE)**

### **THE PRESIDENT MR WAVEL RAMKALAWAN**

Mr Speaker i en gran loner pou mon ozordi ankor enn fwa an relasyon avek travay ki Lasanble Nasyonal in fer, pou mwan anonse ki pou dir Gouvernman ti pran o serye, Mosyon ti ganny anmennen par

Onorab Regina Espanon lo bann zenn fiy e bann madanm dan Sesel.

Letan ou ti demande ki Gouvernman I fer fasilité pou ki bann fiy i kapab ganny bann provizyon pou bann prodwir sanniter. I mon loner mon anonse ki apartir Zanvyé 2022 an kolaborasyon avek Mr Vijay Patel, Gouvernman pou fer *available* pou tou bann zenn fiy ki dan lekol, bann prodwir sanniter gratwitman.

**(APPLAUSE)**

### **THE PRESIDENT MR WAVEL RAMKALAWAN**

An plis ki sa i en loner osi pou mwan anons avek Lepep Seselwa ek Lasanble Nasyonal, ki poudir dan en lot proze ki Gouvernman in antre ladan avek STC, tou bann rezidan dan nou bann *Old Peoples' Homes* lo Mahé, Praslin avek La Digue pou nobou ganny tou bann *diapers* ki zot bezwen gratwitman.

**(APPLAUSE)**

### **THE PRESIDENT MR WAVEL RAMKALAWAN**

E Mr Speaker parey nou ti anonse osi tou, pli boner sa lannen letan mon ti premyerman etabli en Komite

pou zot regard non bann semen, spesyalman bann semen ki anmenn en eleman divizyon, en eleman koudeta.

*Cabinet* in deza aprouv non bokou sa bann semen. Bann sanzman ki'n arrive avek bi pou nou anmenn rekonsilyasyon Nasyonal.

Lalis konplet i ava ganny anonse sa semenn. Me ozordi mon anvi zis mansyonn mansyonnen ki poudir parmi bann novo non, nou pou onor 4 Seselwa, 4 endividé osi en fanmir Seselwa ki sorti lo Praslin. Liberation Road Bel Eau dezormen pou ganny renonmen i pou sanz son non e i pou vin *French Chang-Him Road*.

**(APPLAUSE)**

### **THE PRESIDENT MR WAVEL RAMKALAWAN**

E sa nou ava mazinen ki *Bishop Chang-Him* i premye Levek Seselwa e i ti reste Bel Eau long lannen. Alors nou pou onor li.

Church Street - Semen Legliz son non pou sanze e i pou ganny nonmen an loner premye Levek Katolik e pou dezormen ganny apele *Rue Felix Paul*.

**(APPLAUSE)**

### **THE PRESIDENT MR WAVEL RAMKALAWAN**

Kot Libreri Nasyonal i ete ki reprezant en sant pou kiltir, nou'n deside pou nou onor enn nou bann Seselwa vreman talante e ki'n fer gran kontribisyon dan Sesel alors i pou ganny apele plas Antoine Abel.

Sa semen ant laboutik Weeling e *round about STC* nou pou nonm li en Seselwa - premye Seselwa pou form en parti politik Sesel e ki reprezant sa modernite dan politik. Donk i pou ganny apele *Rifned Jumeau Street*.

**(APPLAUSE)**

### **THE PRESIDENT MR WAVEL RAMKALAWAN**

Semen ant Moniman Bisantener ziska *Interisland Ferry*, nou pou nonm li apre en fanmir Praslin ki'n fer gran kontribisyon dan vwayaz ant Mahé ek Praslin ki'n zwe en gran rol.

Alors in annan zenerasyon apre zenerasyon. Ti difisil pou nou swazir zis enn, alors nou pou apel li *Grandcourt Road*.

**(APPLAUSE)**

### **THE PRESIDENT MR WAVEL RAMKALAWAN**

Lavenir Senk Zen ki pli gran semen ki pran depi Le Chantier ziska Radyo Sesel, pou dezormen reprezent sa pli gran larout ki nou, nou krwar konman en pep e lo ki nou baz nou bann desizyon i pou ganny apele *Constitution Avenue*.

**(APPLAUSE)**

**THE PRESIDENT MR WAVEL RAMKALAWAN**

E *Revolution Avenue* pou retourn lo son non orizinal savedir *Royal Street*.

**(APPLAUSE)**

**THE PRESIDENT MR WAVEL RAMKALAWAN**

Mr Speaker letan mon pe ariv ver lafen mon diskour, mon ti ava kontan ozordi ankor enn fwa. Dir avek Lepep Seselwa ki nou Gouvernman i reste en Gouvernman ki angaze dan lalit kont koripsyon.

Nou enterese donn nou pep novo lespwar. Nou pou kontinyen promot la demokrasi e asire ki progre ek limite i renye dan nou later. Nou pou kontinyen rod tou demars pou nou fer desann pri lavi. E donn nou pep meyer lavi posib.

Nou manifesto i en manifesto pou 5an. Alor mon

dir avek Lepep Seselwa pa espekte ki tou keksoz ti pou'n fini ganny fer dan en lannen.

Me mwan konman sa enn ti prezant sa manifesto devan zot, mon annan gran loner poudir definitivman nou pe mars lo sa larout pou nou kapab delivre.

Nou'n fini konmans tous preski tou eleman dan nou manifesto, nou pou kontinyen fer li e byento, byensir nou pa pou kapab fer li zis nou tousel, me nou pou bezwen sipor premyerman Lasanble Nasyonal e nou pou bezwen osi sipor tou bann lenstitisyon ki'n ganny etabli, me osi tou bann Seselwa ki onnet, bann Seselwa ki anvi vvar en meyer demen pou son zanfan.

Alors kont lo nou! Kont lo nou! Nou pa pou les nou pep tonbe. Nou pa pou dezapwented zot. E anmezir ki nou servi sa pep avek tou liminite, nou pou rod lasazes Bondye tou pwisan.

E nou pou demann Bondye pou kontinyen vers son benediksyon lo nou pei Sesel. Beni sak zanfan Seselwa, ede retir ou sa bann keksoz mal ki pe afekte nou zanfan. Ede pou nou kapab fer sak zanfan ganny en rev, viv son rev e akonpli son rev. Nou konnen Bondye pou beni nou.

E Mr Speaker 1an depi ki mon'n sermante konman Prezidan Sesel, mon anvi dir avek tou Seselwa "Wavel Ramkalawan *pa pou zanmen les tonbe!*" Mersi bokou.

**(APPLAUSE)**

### **MR SPEAKER**

*Thank you Mr President.* Lo lapar nou Lasanble mon anvi eksprim nou viv rekonesans, pou Prezidan Ramkalawan, pou partaz sa bann mo sa bann remark lo sityasyon nou pei. E osi sirtou pou sa lespri avek ki in antreprann travay pou redres nou pei.

Mon remersye li pou sa bann mo lankourazman ki in annan lo Lepep Seselwa e pou sa lespwar ki'n anmennen pou remet nou pei lo bon semen.

E mon profit lokazyon pou remersye Vis-Prezidan Ahmed Afif, e Konsey Minis pou zot travay, e sirtou pou zot langazman avek Lasanble. Mersi Prezidan osi pou rekonnet Lasanble dan travay gouvernans sa pei. Nou apresye sa bann mo ki ou'n adrese a nou egar.

E permet mwan osi remersye *staff* nou Lasanble ki'n travay pou prepar sa lokazyon, e ki vin zis en par dan zot travay ki zot fer pou siport

nou Lasanble toulezour ki nou pe travay isi.

Mersi bokou bann Manm e mon eksprim nou langazman pou kontinyen travay, pou ranpli nou responsabilite anver devlopman e anver byennet nou pep.

Mersi zot tou e mon swet zot bonn sware. Lasanble i ava adjourn a se moman e nou ava repran travay demen *matin* a ler labitid. Mersi, bonn sware.

**(ADJOURNMENT)**